


उडीक



काळा काळा बादलिया
हिवडे हेत जगावे ।।
उमड घुमड आँधी सागे
क्यूँ बिना बरसियां जावै ।।

हल खडणिया करसा भाई,
बाट जोवता रैवै ।।
क्यूँ छेह लेवे रे सांवरिया
जीव जीनावर रोवै ।।

खाली कागद लेखक ने
खेत सरीसा लागे,
कलम 'हळ' सूँ खड खड ने
शब्द उगावणा चावै,

कलम री स्याही सूखे तो
आँसु ने स्याही बणावे
हिवडे रा आखर चोब चोब ने
शब्दां रो धान उगावे

सियाळो उनाळो भोग्यो
चौमासो बिरखा बरसावे,
जीव जिनावर भूखा तिरसा
हिवडे री भूख मिटावे,

हे कानूडा हे रामदेव
अब थांरो ही बिस्वास है
किरपा करो पाणी बरसाओ
आ सगळा री अरदास है

बुढा ठाडा ने टाबर टूबर
दुःख घणो ही पावे
तिरसां मरता मिनख ने ढांडा
भूखा तिरसा सु जावे,

कुवा बावडी तालाब सुखगया
अब मिनखां री बारी है
हाथ जोड़ अरदास करूँ
अब आगे मर्जी थांरी है
न्यायाधिपति गोपाल कृष्ण व्यास
अध्यक्ष-मानवाधिकार आयोग
राजस्थान